



Հարգելի՛ ընթերցող.

ԵՊՀ հայագիտական հետազոտությունների ինստիտուտը, չհետապնդելով որևէ եկամուտ, իր կայքերում ներկայացնելով հայագիտական հրատարակություններ, նպատակ ունի հանրությանն ավելի հասանելի դարձնել այդ ուսումնասիրությունները:

Մենք շնորհակալություն ենք հայտնում հայագիտական աշխատասիրությունների հեղինակներին, հրատարակիչներին:

Մեր կոնտակտները՝

Պաշտոնական կայք՝ <http://www.armin.am>

Էլ. փոստ՝ info@armin.am

ՔԱՐՈՋ

ԲՈՒՆ ԲԱՐԵԿԵՆԴԱՆԻ

«Մարդը պատուի մէջ էր եւ չիմացաւ, Հաւասարուեց անբան անասուններին եւ նմանուեց նրանց»¹:

ՀՐԱՄԱՆԱԻ
Տ. ՊԱՐԳԵԻԻ
ՍՐԲԱԶԱՆ ԵՊԻՍԿՈՊՈՍԻ
ԱՌԱՋՆՈՐԴԻՆ ԱՐՑԱԽԱՅ

Մարդը պատուի մէջ էր, քանզի ստեղծուեց որպէս բոլոր տեսանելի արարածների թագաւոր ու իշխան, եւ նրա համար ստեղծուեցին երկինքն ու երկիրը, բոյսերն ու կենդանիները, ինչպէս Սուրբ Գիրքն է ասում. «Ամէն ինչ նրան հնազանդ ստեղծեցիր եւ դրեցիր նրա ոտքերի տակ»²: Քանզի բոլոր արարածները մարդու ծառաներն ու սպասաւորներն են. ոմանք՝ որպէս լծկան, ոմանք՝ որպէս բեռնակիր, ոմանք էլ՝ այլեւայլ կարիքների համար: Իսկ մարդը ոչ ոքի ծառան չէ, այլ ազատ է եւ ինքնակալ: Այս է ցոյց տալիս նրա կազմուածքը, որ դէպի վեր է ուղղուած եւ ոչ թէ անասունների պէս կորագլուխ՝ ի նշան հնազանդութեան:

Երկրորդ՝ մարդն իր մէջ կրում է բոլոր արարածների նմանութիւնը. քանզի անշունչ-ն՝ ո՞ր պէս տեսանելի գոյացութիւն է, բոյսերի սլէս անում է, կենդանիների պէս՝ զգում եւ

1 Սաղմ. ԽԸ 3

2 Սաղմ. Ը 6

հրեշտակների պէս՝ գիտեմում: Այս պատճառով մարդը երկրի վրայ փոքր աշխարհ է կոչւում:

Երրորդ՝ մարդու համար պատիւ է այն, որ Աստուած նախ խորհեց, թէ ինչ ստեղծի, եւ ինչպիսիս լինի, ում վրայ իշխի եւ Ում պատկերն ունենայ, եւ ապա ստեղծեց մարդուն, ինչպէս ասում է. «Ստեղծեցք մարդուն Մեր պատկերով ու նմանութեամբ, եւ թող իշխի ձկներին ու ծովին»³: Ո՛վ մեծաքանչ խորհուրդ. երկինքը, երկիրն ու ծովը, արեգակը, լուսինն ու աստղերը ստեղծուեցին առանց խորհուրդ անելու, մինչդեռ մարդու մասին նախապէս խորհում է Աստուած, եւ Նրա խորհելով մարդը կար իր լինելութիւնից առաջ:

Չորրորդ՝ բոլոր արարածների համար ասաց եւ եղան, հրամայեց եւ հաստատուեցին, իսկ մարդուն ձեռքով ստեղծեց, ինչպէս գրուած է. «Տէր Աստուած վերցրեց երկրի կաւը եւ նրանից ստեղծեց մարդուն»⁴, որ խորհրդանշում է մարդու հանդէպ առաւել հոգածութիւնը:

Հինգերորդ՝ ինչպէս որ մեծատուն այրը, երբ կամենում է պատուել որեւէ մէկին, նախ նրա կերակուրն ու ըմպելիքը, տեղն ու զարդարանքներն է պատրաստում եւ ապա նրան հրաւիրում, այնպէս էլ ամենից Մեծատունը՝ Աստուած, նախ պատրաստեց այն ամէնը, ինչ անհրաժեշտ է մարդուն՝ զանազան կերա-

կուրներ եւ ըմպելիքներ, երկինքը՝ որպէս ծածկ, երկիրը՝ որպէս յատակ, լուսատուները՝ որպէս նրազ, գեղաձայն երգեցիկ թռչուններով եւ բազմապիսի ծառերով դրախտը՝ որպէս բազմոց, եւ ապա մեծարեց մարդուն պատուելով, որպէսզի նա ի բնէ ոչ թէ սին ու աղքատիկ, այլ առատ եւ լի բարիքների տէր լինի:

Վեցերորդ՝ մարդը ողջ աշխարհի կապն ու լրումը եղաւ, քանզի նրանից առաջ եղած իմանալի եւ զգալի գոյացութիւնները⁵, որ միմեանցից բաժան էին եւ հեռու, Աստուած ժողովեց մի էութեան մէջ՝ մարդուն կազմելով իմանալի հոգով եւ զգալի մարմնով, որով երեսում է, որ մի է ողջ աշխարհը՝ Մի Արարչի կողմից ստեղծուած:

Եօթերորդ՝ անմարմինները զուրկ են մարմնաւոր, իսկ մարմնաւորները՝ անմարմին բարիքներից, իսկ մարդուն Աստուած պատուեց՝ երկու բարիքներին էլ հաղորդ դարձնելով: Քանզի ինչ որ ինքն ուներ, տուեց եւ մարմնաւոր բարիքներն էլ չխնայեց ու չնախանձեց. ահա այս է մարդուն կրկնակի պատուելը:

Ութերորդ՝ Աստուած մարդուն զարդարեց առաքինութեամբ, որպէսզի ոչ միայն ձրի տուրքով, այլեւ վարձքով պսակի: Քանզի հրեշտակները չեն կարող ո՛չ անելացնել եւ ո՛չ էլ նուազեցնել իրենց գոյացական վարձքը, մինչդեռ մարդը կարող է աճել առաքինութեամբ:

3 Տե՛ս ԾՃ. Ա 26:

4 Տե՛ս ԾՃ. Բ 7:

5 Այսինքն՝ հոգեւոր եւ միսական աշխարհները:

Ինձներորդ՝ մարդը երկու պատիւ աւելի ունի, քան միւսները, որոնք են՝ մեղքերի թողութիւնն ու մարմնի յարութիւնը: Եւ այստեղ հոգին՝ մարմնի, իսկ մարմինը հոգու շնորհիւ է վարձատրում, քանզի մարմնի պատճառով ենք մեղքերի թողութիւն ստանում (միւսն էր հրեշտակներն այդ չեն կարող ունենալ, որովհետեւ մեղքի ենթակայ մարմին չունեն). եւ քանի որ անմահ հոգի ունենք, նաեւ մարմնի յարութեան ենք արժանանում (որն այլ կենդանիներ չունեն):

Տասներորդ՝ քանզի մարդն Արարչի պատկերով ստեղծուեց, որը գերագոյն է բոլոր պատիւներից, ինչպէս գրուած է. «Աստուած մարդուն ստեղծեց իր պատկերով»⁶, այսինքն՝ մտքով. բանականութեամբ, անձնիշխանութեամբ, սրբութեամբ, բարութեամբ եւ այլ յատկութիւններով, եւ նրան բնակեցրեց Ադէմի անապական դրախտում եւ իր պատուելի պատկերը զարդարեց լուսեղէն զգեստով ու անմահ կեանքով, ինչպէս ասում է. «Մարդը պատուի մէջ էր»: Սակայն մարդը, որ Արարչի պատկերին խառնուած ունէր նաեւ հողեղէնի պատկերը (քանզի, ինչպէս գրուած է, արու եւ էգ ստեղծեց նրանց⁷), զրկուեց իր պատուից եւ նմանուեց անասունների: Միւսն էր Քրիստոսի համար չկայ արու եւ էգ, ասում է առաքեալը⁸, որից հետեւում է, որ սրանով մարդը նման չէ Աստծուն: Իսկ թէ ինչու Աստուած արու եւ էգ ստեղծեց

6 Ծն. Ա. 27

7 Առ. 1: 26

8 Եբ. 2: 17

նրանց, այս մասին վարդապետները հինգ պատճառ են նշում:

Նախ՝ որպէսզի պատկերը տարբերուի իր Նախատիպից, քանզի ամբողջովին նմանը նոյնն է:

Երկրորդ՝ քանզի կամեցաւ, որ մարդը հոգեւոր բարիքի հետ նաեւ մարմնաւորը վաշելի:

Երրորդ՝ որպէսզի ոչ միայն ձրիաբար, այլեւ մարմնի առաքինութեամբ արժանանայ պարգեւների, ինչպէս որ վերը ասացինք:

Չորրորդ՝ որովհետեւ կամեցաւ, որ մարդկանց բազմացումն այսպէս լինի. քանզի երբ նրանք ընկան հրեշտակային կեանքից, կենդանիների նման բազմացան:

Հինգերորդ՝ մարդկանց փրկութեան համար, որն իրականացաւ Փրկչի մարմնացմամբ: Այս պատճառով մարմինը խառնուեց հոգու հետ՝ միջասահման կեանքով դրուելով դրախտի միջասահման վայրում, այսինքն՝ մահուան եւ անմահութեան միջեւ, որպէսզի անձնիշխան կամքով ինչը որ ընտրի, այն էլ ստանայ՝ կա՛մ մահ, կա՛մ անմահութիւն: Եւ նրա առջեւ դրեց բոլոր ծառերը, որոնք բովանդակում էին բարիքների եւ երանութիւնների ամբողջութիւնը, որպէսզի նրանցով մարդը միշտ մնար անմահութեան մէջ: Այս է մեր առաջին եւ սկզբնական կեանքը, որը կորցրինք եւ Յարութեան օրը վերստին պիտի ստանանք:

Այլեւ մահուան սպառնալիքով մարդուն հրաժարեցրեց բարու եւ չարի գիտութեան

ծառից⁹: Իսկ նա թողեց անմահ կեանքը՝
անապով օձի պատրանքներին ու հեշտանա-
լով զգայություններով, կորցրեց իր մէջ
աստուածային պատկերը եւ պատուեց
անասնականը: Այսպէս մարդը հաւասարուեց
անբան անասուններին ու նմանուեց նրանց
բարկութեամբ, ցանկութեամբ եւ այլ յատկու-
թիւններով:

* * *

Այստեղ երեք հարց է ծագում:

Նախ՝ ինչո՞ւ բարկանալն ու ցանկանալը
մեզ համար մեղք է, իսկ կենդանիների հա-
մար՝ ոչ:

Երկրորդ՝ ինչո՞ւ ենք առաւել հեշտու-
թեամբ մեղք գործում, քան բարիք:

Եւ երրորդ՝ ի՞նչ պատճառով ենք մեղք
գործում:

Ա. Ինչո՞ւ անբան կենդանիների համար
բարկութիւնը, ցանկութիւնը եւ միւս յատկու-
թիւնները բնական են համարւում, իսկ մեզ
համար՝ ախտ եւ մեղք:

Պէտք է ասել, որ սրանք անբան կեն-
դանիների համար ոչ միայն բնական են,
այլեւ նրանց պահպանող յատկութիւններ.
քանզի բարկութեամբ են յարատեւում գիշա-
տիչ գազանները. եւ բազմաձին կենդանիները
ցանկութեամբ են բազմանում. երկշտու-
թեամբ են փրկւում նապաստակներն ու բոլոր
տկար կենդանիները՝ հզօրներից. որկրամո-
լութեամբ են գոյատեւում խոշոր կենդանի-

ները. եւ ատելութեամբ է ոչխարը խուսափում
գայլից. խրոխտութիւնը պատուելի է դարձ-
նում ձիուն եւ այլն: Եւ սակայն այս գործերը,
որ նրանց համար պահպանող նշանակութիւն
ունեն, մեզ համար կործանարար են եւ մեղ-
սալի: Որովհետեւ նախ՝ այս ախտերը նրանց
մօտ չափաւոր են, իսկ մարդու մօտ՝ չափա-
զանց: Սրա պատճառը մեր միտքն է, քանզի
ինչպէս մշակն է անեցնում բազմաբեղուն
սերմը, այսպէս էլ միտքը, չարը խորհելով,
մեզանում բազմացնում է այս ախտերը: Դա
երեւում է, օրինակ, բարկանալիս, երբ միտքը
սրտի բարկութեանը ոխ, քէն ու նախանձ է
յաւելւում. նմանապէս ցանկութեանը շնութիւն
ու պոռնկութիւն է հանապազ յաւելւում (մինչ-
դեռ անասունները պատշաճ ժամանակին են
խառնակւում) եւ որկրամոլութիւն՝ բազմազան
կերակուրներ ու ըմպելիքներ յօրինելով եւ
այլն: Այս պատճառով սրանք մեզ համար
ախտ եւ մեղք են կոչւում:

Երկրորդ՝ քանզի այս բաները կենդա-
նիները գործում են ըստ բնական կարգի, իսկ
մենք անբնական ենք դարձնում. ինչպէս ան-
պտուղ հողը, որ փչացնում է բարի սերմերը
եւ փուշ անեցնում, այդպէս էլ մենք Աստուծոյ
տուած բարի սերմերը չարի ենք փոխարկւում:
Այդպէս բարկութիւնը, որ բարի է ընդդէմ չա-
րի, փոխարկւում ենք ընդդէմ բարու. եւ կամ
բարու հանդէպ ցանկութիւնը փոխարկւում ենք
չար ցանկութեան. այսպէս եւ խոհականու-
թիւնը վերածում ենք չար խորհրդածութեան
ու խորամանկութեան. եւ սերը, որ պէտք է առ
Աստուած տաճէինք, դէպի երկրաւոր բաներն

ու մեղքն ենք ուղղում: Պէտք էր ասել մեղքը, իսկ մենք արդարութիւնն ենք ասում: Յոխորտալ էր պէտք չարիքի հանդէպ եւ չհնազանդուել, իսկ մենք անհնազանդ ենք Աստուծոյ օրէնքին եւ հպարտանում ենք ընկերոջ հանդէպ: Անարգում ենք մեր հոգին, որ Աստուծոյ պատկերն է, եւ պատում մեր մարմինը, որ անասունների պատկերն է, ինչպէս ասում է. «Մարդը պատուի մէջ էր, բայց լքեց այն եւ հաւասարուեց անասուններին»: Եւ այս երկու պատկերի, այսինքն՝ աստուածային եւ անասնականի կառավարը մարդու միտքն է, որը զարգացնում է այն պատկերը, որը կամենում է: Քանզի աստուածային պատկերը սրբութեամբ եւ առաքինութեամբ գեղեցկացնում է մեր մէջ, իսկ մեղսական գործերով՝ տգեղանում ու կորչում: Ինչպէս որ ժանգոտ հայելին չի արտացոլում մարդու պատկերը, իսկ մաքուր հայելու մէջ յստակօրէն երեւում է այն, այնպէս էլ երբ սրբում ենք մեղքերից, նոյնժամ մեզանում պայծառանում է աստուածային պատկերը:

Բ. Ինչո՞ւ մարդու համար առաւել դիրքին է հակուել դէպի մեղքը, քան դէպի առաքինութիւնը:

Չորս պատճառով:

Նախ՝ որովհետեւ մարմինը, ծանր ու վայրաքարշ լինելով, դիրքութեամբ է միաբանում մեղքի ծանրութեան հետ ընդդէմ հոգու եւ դէպի վար քաշում այն, ինչպէս որ քարը հեշտութեամբ ցած է զլորում լեռան բարձունքից: Իսկ առաքինութիւնն ու միտքը թէպէտ թեթեւ են, սակայն, կապուած լինելով

մարմնի հետ, դժուարութեամբ են մարմինն իրենց ետեւից տանում, ինչպէս երկանաքարը լեռան գլուխ բարձրացնելիս:

Երկրորդ՝ որովհետեւ զգայարանները անասնական պատկերին են, որոնցով մարմինը դիրքութեամբ բռնում է մեղքի հեշտութեամբ՝ իր ետեւից քաշելով միտքն ու խորհուրդները:

Երրորդ՝ որովհետեւ մարմնական հեշտութիւնն անմիջաբար ներկայում է, իսկ հոգեւորը՝ հեռու ապագայում՝ յոյսի ակնկալութեամբ, որի պատճառով յապաղում ենք հոգեւոր գործերում:

Չորրորդ՝ որովհետեւ մանկութիւնից աշխարհի հեշտութեանն ենք վարժուած եւ ընտելացած, իսկ հոգեւորին՝ անընտել:

Գ. Իսկ թէ ի՞նչն է մեղքի պատճառը, այս մասին Եկեղեցու սուրբ վարդապետներն ասում են, որ ամէն ոք մեղանչում է երեք պատճառով. նախ՝ չարունակութիւնից, երկրորդ՝ չար սովորութիւնից, երրորդ՝ տգիտութիւնից:

Չարունակութիւնը լինում է ըստ մեր մարմնի խառնուածքի, քանզի տարրերի աւելցուկը կամ պակասութիւնը մեղք է առաջացնում մեր մէջ¹⁰: Այսպէս՝ դառնամաղձոտները բարկացկոտ են (քանզի դառը մաղձը հրեղէն

¹⁰ Այստեղ խօսքն առնչում է մարդու չորս հոգեբանական խառնուածքների (խոլերիկ, ֆլեգմատիկ, մելանխոլիկ, սանգուինիկ) ուսմունքին, որը Եկեղեցու հայրերը որդեգրեցին «արտաքին իմաստուններից», եւ որի հետ կապուած հասկացութիւնները շարունակում են գործածուել արդի հոգեբանութեան մէջ:

տարրն է). իսկ արեան խոնաւ եւ ջերմ աւ-
շային խառնուածք ունեցողները՝ երկրաքարշ
ու ցանկասէր. սեւ մաղձ ունեցողները ծոյլ են
ու տրտմակեաց. իսկ ում մօտ օդի տարրն է
առաւել, նա թեթեւամիտ է, անհամբեր ու
հպարտ:

Չար սովորութիւնն այն է, երբ մարդ, մա-
նուկ հասակից չար միջավայրում ապրելով ու
չար ընկերներից չար գործեր սովորելով, հա-
նապազ նոյնը գործելով, ձեռք բերած սովո-
րութեան համաձայն անխտիր մեղանչում է:
Քանզի, ինչպէս ասում են իմաստասէրները,
երկար ժամանակ կատարուող գործը սովո-
րութիւն է դառնում:

Իսկ տգիտութիւնը Սուրբ Գրքի եւ Օրէն-
քի, ինչպէս նաեւ սուրբ այրերի խրատների
չիմացութիւնն է, որի պատճառով մարդ չա-
րիքը որպէս թէ բարիք է գործում: Քանզի
բարիքները տարբեր են. կայ բարի, որ զուտ
եւ իսկապէս բարի է, ինչպէս Աստուած, ար-
քայութեան կեանքը եւ առաքինի գործերը,
որոնցով նմանում ենք զուտ եւ իսկապէս բա-
րի Աստծուն. եւ կայ բարի, որ արտաքուստ է
բարի երեւում, բայց ներքուստ չար է՝ բարու
կերպարանքով: Որովհետեւ եթէ չարն ակն-
յայտ լինէր, ոչ ոք չէր գործի (քանի որ չարից
բոլորը փախչում են), սակայն գործում են,
որովհետեւ այն բարիով է պնդւած լինում
(իսկ բարին բոլորն են ցանկանում): Այս
պատճառով արտաքուստ բարին ցանկացող-
ները որսում են թաքնուած չարիքով, ինչպէս
որ թոչունն է բռնում թակարդով, եւ ձուկը՝
կարթով: Քանզի արծաթասէրին արծաթի

գոյնն է պատրում, պողոնիկին՝ հեշտախառու-
թիւնը, գողին՝ ունեցուածքի շահը. եւ սրանցով
մեղանչելուց յետոյ բոլորը մահուան են մատ-
նւում, ինչպէս Աստուած ասաց նախա-
ստեղծներին. «Որ օրը որ ուտէք, մահով
կմեռնէք»¹¹: Քանզի սա է մեր հոգու դրախ-
տում բարու եւ չարի գիտութեան ծառը, այ-
սինքն՝ մեր միտքը, որի մէջ խառնուած են
բարին ու չարը. եւ չի կարողանում զանա-
գանել, թէ որն է իսկապէս բարի եւ որը՝ ար-
տաքուստ կերպարանուած: Պտուղը չար
գործն է՝ ծնուած չար խորհուրդներից: Խրա-
տաւոր օձը սատանան է, որ խաբում է մեզ:
Իսկ պտղի գեղեցկութիւնն այն է, որ մեղքը
հաճոյք է պատճառում մեր զգայարաններին,
բայց երբ գործում ենք, դատապարտում ենք
մահուան: Քանզի ինչպէս որ մեղքն են խառ-
նում մահացու թոյնին, այնպէս էլ սատանան
մեղքերի մահադեղին քաղցր հեշտութիւններ
է խառնում: Ինչպէս որ արեց այն ժամանակ
Ադամին, այնպէս էլ այժմ՝ մեզ: Եւ ինչպէս որ
Ադամն այնժամ զրկուեց դրախտի անմահ
կեանքից եւ աստուածոտեսութիւնից, այնպէս
էլ այժմ ամէն ոք մեղանչելով՝ զրկւում է ար-
քայութիւնից եւ աստուածոտեսութիւնից: Եւ
ինչպէս որ Ադամն ընկաւ անիծեալ երկիր¹²
ու մահուան դատապարտուեց, այնպէս էլ մե-
ղաւորը դժոխք է ընկնում՝ ըստ այսմ. «Հե-
ռացէ՛ք Ինձանից, անիծեալներ, դէպի յաւի-
տեանական հուրը»¹³: Եւ ինչպէս որ Ադամը,

11 Ծճ. Բ 17

12 Տե՛ս Ծճ. Գ 17:

13 Մատթ. ԻԵ 41

պտուղն ուտելով, նոյնժամ հոգով մահուան մէջ յայտնուեց (թէպէտ ինը հարիւր երեսուն տարի ապրեց եւ ապա մեռաւ մարմնով), այնպէս էլ մեղաւորը մեղք գործելուց յետոյ յայտնուում է մահուան ու դժոխքի մէջ, թէպէտեւ բազում ժամանակներ անց՝ վախճանին է դժոխք մտնելու: Եւ երբ Դատաստանի ժամանակ հարցաքննութիւն լինի, ինչպէս Ադամի հետ եղաւ, այնժամ Ադամի պէս կանիծուեն մեղաւորները, եւ երկունքն ու ցաւը կ'ապտեն նրանց, ինչպէս Եւային: Եւ այնժամ կ'դատաւարտուի բանաւարկու օձը՝ նետուելով յաւիտեանական հուրը, քանզի մեղքերին հետեւում է դատաստանը, իսկ դատաստանին՝ պատիժը: Եւ Դատաստանը վախճանին է լինելու, քանզի Տէրը մի Օր հաստատեց, որում դատելու է բոլորին¹⁴, ուր դատաւորն է Քրիստոս: Երբ Նա գայ Հօր փառքով սուրբ հրեշտակների հետ, այնժամ կ'բաժանի գառներին այծերից¹⁵, ասիւնք՝ արդարներից՝ մեղաւորներից: Այնժամ չարերին կ'հատուցի տանջանքներ, իսկ արդարներից՝ փառք՝ ըստ այսմ. «Ովքեր բարիք են գործել, յարութիւն կ'առնեն յաւիտեանական կեանքի համար, իսկ ովքեր չարիք՝ դատաւարտութեան»¹⁶. եւ դարձեալ՝ «Մենք բոլորս պիտի կանգնենք Քրիստոսի Ատենան առջեւ, որպէսզի իրաքանչիւրս իր մարմնով ընդունի այն, ինչ գործել է նախկինում. եթէ չարիք է գործել՝ չարիք, եւ եթէ բարիք՝ բարիք»¹⁷: Եւ այս ամէնը

պիտի լինի վախճանին:

Սակայն վերադառնանք մեր նախկին խօսքին, թէ՛ մեղքի չար գործերը տգիտութիւնից ենք գործում, քանզի բարին խառնուած է չարի հետ, եւ տգէտ մտքով չենք կարող զանազանել միմեանցից: Որովհետեւ ո՛չ բնական, ո՛չ անկիրթ եւ ո՛չ էլ զգայարաններին խառնուած միտքը չի կարող զանազանել սրանք եւ ընտրել: Քանզի բնական միտքը չունի Ծնորհի լոյսը, անվարժ՝ Սուրբ Գրքի կրթութեան լոյսը, իսկ զգայարաններին խառնուած միտքը խաբւում է զգայարանների կողմից: Մինչդեռ Ծնորհով լուսաւորուած, Սուրբ Գրքի կրթութեամբ վարժուած եւ զգայութիւններին չխառնուած տեսական միտքն ընդունակ է ընտրել եւ զատորոշել կերպարանուած բարին ճշմարիտ բարուց:

Արդ. այս երկու բարիները տասը կերպով զանազանում են միմեանցից:

Նախ՝ ըստ իմաստասէրների՝ կերպարանուած բարին միայն անունով է բարի, բայց ոչ՝ ըստ իրողութեան, իսկ ճշմարիտ բարին՝ թէ՛ անուամբ եւ թէ՛ իրողութեամբ:

Երկրորդ՝ սա սկզբում է բարի, իսկ վերջում՝ չար, իսկ իսկապէս բարին բարի է թէ՛ սկզբում, թէ՛ վերջում:

Երրորդ՝ ճշմարիտ բարին միաբնոյթ է եւ ոչ հակասական, իսկ պիտակաւոր բարին՝ բազմաբնոյթ եւ խառնակ:

Չորրորդ՝ սա արտաքուստ է բարի, իսկ ներքուստ՝ չար, իսկ նա բարի է թէ՛ ներքուստ, թէ՛ արտաքուստ:

14 Տե՛ս Գործ. Ժէ 31:

15 Տե՛ս Մատթ. ԻԵ 32-33:

16 Յովհ. Ե 29

17 Հռով. ԺԳ 10

Հինգերորդ՝ սա մարմնի համար է բարի, իսկ հոգու համար՝ չար, իսկ նա բարի է ե՛ր հոգու, ե՛ւ մարմնի համար:

Վեցերորդ՝ սա բարի է այս կեանքի համար, իսկ հանդերձեալի համար՝ չար, իսկ ճշմարիտ բարին երկուսի համար էլ բարի է:

Եօթերորդ՝ սա բարի է կեանքում, իսկ մահուան մէջ՝ չար, իսկ զուտ բարին՝ ե՛ւ կեանքում, ե՛ւ մահուան մէջ:

Ութերորդ՝ սա բարի է ժամանակատրայէս, իսկ յաւիտեանայէս՝ չար, իսկ նա՝ յաւիտեանական բարի:

Իններորդ՝ սա փոփոխական բարի է, իսկ նա՝ անփոփոխ:

Տասներորդ՝ այս մարմնական բարիքով սատանային ու դժոխքին են հաղորդ լինում, իսկ այն հոգեւոր բարիքով՝ անստեղծ եւ զուտ բարի Աստծուն՝ արքայութեան ժառանգորդ լինելով:

Այս զանազանութեան մասին շատերը չգիտեն եւ կերպարանուած բարին են գործում, որպէս թէ ճշմարիտը, որ մեղք է եւ չարիք: Այսպիսով, մարդ մեղանշում է. նշուած երեք պատճառներով՝ չար սովորութեան, չարունակութեան եւ տգիտութեան, որոնց բժշկութիւնը լինում է այսպէս:

Չար սովորութիւնը բժշկւում է բարի սովորութեամբ՝ բարի միջավայրում, բարի ընկերների հետ բնակուելով, քանզի մարգարէն ասում է. «Սուրբի հետ սուրբ կլինես եւ անբիծ այրի հետ՝ անբիծ»¹⁸, որովհետեւ ինչպէս

որ չարին սովորեցինք անձնիշխան կամքով, այնպէս էլ բարուն ենք սովորում:

Տգիտութիւնը բժշկւում է գիտութեամբ՝ Սուրբ Գրքի սերտմամբ եւ սուրբ այրերի խրատներով, իմանալով Աստուծոյ կանոններն ու պատուիրանները, որոնցով զանազանում են չարն ու բարին:

Իսկ չարունակութիւնը բժշկւում է հեռու մնալով մեր մէջ ցանկութիւններ բորբոքող կերակուրներից (ինչպէս որ վառելանիւթը պակասեցնելիս մարում է հուրը), ինչպէս նաեւ՝ մարմնի տքնութեամբ եւ չարչարանքներով:

* * *

Այս պատճառով, երբ պահքով հեռու ենք մնում աւելորդ կերակուրներից ու ըմպելիքներից եւ տքնութեամբ ու աղօթքով չարչարում ենք մեր մարմինը, ազատւում ենք խառնուածքի չարունակութիւնից, որը դէպի մեղքն է ձգում: Եւ, սրբուելով մեղքերից, մեր մէջ վերստին պայծառանում է Աստուծոյ պատկերը, որն ունէինք ի սկզբանէ՝ նախքան մեղանշելը դրախտում: Եւ քանի որ ճշմարիտ է այս, եղբայրներ, բռնադատե՛նք մեր մարմինները, պնդանա՛ք պահեցողութեամբ, յաճախակի աղօթե՛նք: Մեր սրտերից հանե՛նք չարիքը: Սիրե՛նք միմեանց սուրբ սրտով եւ անկեղծ մտքով: Դառնա՛նք առ Աստուած, եւ Նա կդառնայ դէպի մեզ: Ներե՛նք միմեանց, որպէսզի Նա էլ մեզ ների: Գթա՛նք աղքատների, որպէսզի Նա էլ մեզ գթայ: Քաղցածների համար հաց լինենք եւ մերկերի համար՝

¹⁸ Սաղմ. Ժէ 26

զգեստ, անտունների համար՝ օթեան եւ հի-
ւանդների համար՝ բժիշկ, որպէսզի Աստուած
էլ մեր հոգու եւ մարմնի վերքերը բժշկի՝ ծած-
կելով մեր ամօթալի գործերի մերկութիւնը,
եւ մեզ ժողովի հայրական օթեաններում՝
ամենքին արժանացնելով մշտաւէտ ցնծու-
թեան եւ անտրտում ուրախութեան ի Տէր մեր
Յիսուս Քրիստոս, Որ օրհնեալ է յաւիտեան.
ամէն: